

সংবাদ বিবৃতি

রাজধানীতে সুলতে খতনা করাতে গিয়ে আবারো শিশুর মৃত্যু
দৃষ্টান্তমূলক আইনানুগ ব্যবস্থা গ্রহণ এবং শিশুদের সঠিক চিকিৎসা ও নিরাপদ স্বাস্থ্যসেবা নিশ্চিত করে চাইল্ডস
রাইটস অ্যাডভোকেসি কোয়ালিশন ইন বাংলাদেশ-এর আহবান

রাজধানীর মালিবাগে সুলতে খতনা করাতে গিয়ে আহনাফ তাহমিন আয়হাম (১০) নামের এক শিশুর মৃত্যু ঘটেছে। বিগত দুই মাসের মধ্যে এইরূপ দ্বিতীয় ঘটনা এটি। চাইল্ডস রাইটস অ্যাডভোকেসি কোয়ালিশন ইন বাংলাদেশ এ বিষয়ে গভীর উদ্বেগ প্রকাশ করেছে ও দ্রুততার সাথে এ ঘটনার সুষ্ঠু তদন্ত সাপেক্ষে দায়ীদের বিরুদ্ধে দৃষ্টান্তমূলক আইনানুগ ব্যবস্থা গ্রহণের দাবি জানাচ্ছে এবং শিশুদের সঠিক চিকিৎসা ও নিরাপদ স্বাস্থ্যসেবা নিশ্চিত করার জোর আহবান জানাচ্ছে।

গণমাধ্যমে প্রকাশিত সংবাদের ভিত্তিতে জানা যায়, শিশু আহনাফ তাহমিন আয়হাম মতিঝিল আইডিয়াল স্কুল অ্যান্ড কলেজের চতুর্থ শ্রেণির ছাত্র ছিল। গত ২০ ফেব্রুয়ারি ২০২৪ (মঙ্গলবার), সন্ধ্যার পর রাজধানীর মালিবাগের জেএস হাসপাতালে তাকে সুলতে খতনা করাতে নিয়ে আসেন তার বাবা ফখরুল আলম। স্বজনদের অভিযোগ, রাত আটটার দিকে তাদের অনুরোধ উপেক্ষা করে চিকিৎসকরা আহনাফকে ফুল অ্যানেস্থেসিয়া প্রয়োগ করেন। এরপর শিশুটির আর জ্ঞান ফেরেনি। এর কিছুক্ষণ পর হাসপাতালটির পক্ষ থেকে শিশুটিকে মৃত ঘোষণা করা হয়। এর আগেও সুলতে খতনা করাতে গিয়ে শিশু মৃত্যুর ঘটনা ঘটেছে, যা আমাদের উদ্বেগ করে তুলছে। তাছাড়া, প্রায়শই আমরা শিশু, নবজাতক ও গর্ভবতীদের স্বাস্থ্যসেবা প্রদানের ক্ষেত্রে চিকিৎসাজনিত অবহেলার নানা সংবাদ গণমাধ্যম সূত্রে প্রত্যক্ষ করছি।

কোয়ালিশন বিশ্বাস করে, শিশুর স্বাভাবিক জীবনযাপনের সুযোগ নিশ্চিত করতে সঠিক চিকিৎসা ও নিরাপদ স্বাস্থ্যসেবা অত্যন্ত জরুরি। খোদ রাজধানীতে স্বল্প সময়ের ব্যবধানে দুইজন শিশুর সুলতে খতনা করাতে গিয়ে মৃত্যু প্রমাণ করে স্বাস্থ্যখাতের পরীক্ষণ ব্যবস্থা আরো জোরদার করা অত্যাৱশ্যকীয়। কোয়ালিশন এ ধরনের ঘটনার পুনরাবৃত্তিরোধে দ্রুত ও নিরপেক্ষ তদন্ত সাপেক্ষে দায়ী ব্যক্তিদের বিরুদ্ধে দৃষ্টান্তমূলক আইনানুগ ব্যবস্থা গ্রহণের জোর দাবী জানাচ্ছে। পাশাপাশি, কোয়ালিশন সঠিক চিকিৎসাসেবা নিশ্চিত করতে দ্রুততার সাথে দেশের সব লাইসেন্সপ্রাপ্ত ও অনিবন্ধিত বেসরকারি হাসপাতালের তালিকা প্রকাশের জন্য এ সম্পর্কিত উচ্চ আদালতের নির্দেশনা পালনে যথাযথ কর্তৃপক্ষের দায়িত্বশীল ভূমিকা প্রত্যাশা করছে।